

दिनांक 22.01.2025

समय: 18.45 बजे

- प्रधानमंत्री नरेन्द्र मोदी कह्यो—**बेटी बचाओ बेटी पढ़ाओ** अभियान लैंगिक भेदभाव ने दूर करण मांय महताऊ भूमिका निभाई है।
- केन्द्रीय मंत्रिमंडल **राष्ट्रीय स्वास्थ्य मिशन** ने चालता राखण रो फैसलो कर्यो।
- मुख्यमंत्री भजनलाल शर्मा प्रदेश मांय होवण वाळी भर्ती परीक्षावां मांय खास जाग अर सावचेती बरतण रा निर्देश दिया।
- संसदीय कार्यमंत्री जोगाराम पटेल कह्यो—आवता बजट सत्र मांय सदन बत्ती ऊं बत्ती चलावण री कोशिश करी जायेला।

प्रधानमंत्री नरेन्द्र मोदी कह्यो है के **बेटी बचाओ बेटी पढ़ाओ** अभियान लैंगिक भेदभाव ने दूर करण मांय महताऊ भूमिका निभाई है। ई अभियान मांय सगळा तबका री भागीदारी री है अर स्त्री पुरुष रे बीचे अंतर कम व्ह्यो है अर बालिकावां री शिक्षा अर भविष्य सारू बाजिब वातावरण तियार व्ह्यो है। **‘बेटी बचाओ बेटी पढ़ाओ’ अभियान** रा दस साल पूरा होवण माथे सोशल मीडिया पोस्ट मांय श्री मोदी बेटियां रा हकां ने संरक्षण देवण अर बिना किणी भेदभाव रे वां री शिक्षा तैय करण री अरज करी। केन्द्रीय महिला अर बाल विकास मंत्री अन्नपूर्णा देवी कह्यो है के **बेटी बचाओ, बेटी पढ़ाओ योजना** बालिकावां रा सपनां ने नुवी उड़ान देवे है।

प्रदेश री उपमुख्यमंत्री अर महिला बाल विकास मंत्री दिया कुमारी सोशल मीडिया पोस्ट मांय लिख्यो के हर महिलावां री भागीदारी अर अगुवाई बधी है। वणा लिख्यो के लारला दस सालां मांय सरकार महिला कल्याण सारू बजट मांय दो सौ फीसदी री बधवार करी है। ई योजनां रा दस साल पूरा होवण रे मौके केई कार्यक्रम व्ह्या। चूरू मांय ई मौके महिलावां वाहन रैली निकाळी। चूरू विधायक हरलाल सहारण इण ने हरी झंडी दिखा र खाना कर्या। बीकानेर मांय जिला कलेक्टर नम्रता वृष्णि री अगुवाई मांय वाहन रैली री मार्फत बालिका शिक्षा रो संदेश दीरीज्यो।

000

केंद्रीय मंत्रिमंडल **राष्ट्रीय स्वास्थ्य मिशन** ने आवता पांच साल ताई चालता राखण रो फैसलो कर्यो है। मंत्रिमंडल आज नुवी दिल्ली मांय मिशन रे तैत कर्या जा रह्या कामां री प्रगति री समीक्षा करी। केंद्रीय मंत्री पीयूष गोयल मीटिंग रा फैसला री मीडिया ने आ जाणकारी दी। बणा बतायो के **राष्ट्रीय स्वास्थ्य मिशन** रे तैत केई महताऊ लगस पूरा करी ज्या है।

मंत्रिमंडल काश्तकारां रा हित मांय कच्चा जूट रा कमती रा समर्थन भाव ने बधा दिया है। जूट री एम.एस. पी. कोई छः फीसदी बधायी ज्यी है।

000

रोकड बरस 2025–26 रा बजट सारू राय अर बतळ रो दौर चाले। ई कड़ी मांय मुख्यमंत्री भजनलाल शर्मा आज एन.जी.ओ. सिविल सोसाइटीज अर उपभोक्ता मंचां रा नुमाइन्दा रे साथै बतळ करी। मुख्यमंत्री दफतर मांय व्ही ई मीटिंग मांय श्री शर्मा आ हलकां री योजनावां अर सामाजिक सुरक्षा कार्यक्रम माथे बतळ करी।

मुख्यमंत्री कह्यो के मजबूत समाज बणावण मांय एनजीओ, सिविल सोसाइटी अर उपभोक्ता मंच री मोटी भूमिका है। इण रो समाज माथे गैरो असर होवे है अर आ राज्य सरकार री योजनावां ने लोगां ताई पूगावण रो काम करे है। बैठक मांय एन.जी.ओ., सिविल सोसाइटी अर उपभोक्ता मंच रा नुमाइन्दा स्वरोजगार केन्द्र थापित करण, नशा मुक्ति केन्द्र खोलण, सिलिकोसिस बीमारी माथे रोकथाम, गांवां ताई योजनावां रो प्रचार प्रसार करण, बाल सुरक्षा जागरूकता कार्यक्रम, घुमन्तू तबका ने संबल देवण, बालमजूरी माथे रोक लगावण सारू असरदार कार्यवाही करण अर विमंदितां सारू पुनर्वास घर बणावण समेत न्यारा-न्यारा मुद्दा माथे सुझाव दीरीज्या।

000

राज्य मांय कृषि उत्पादां सारू सुरू करी ज्यी एग्री स्टैक योजना अर काश्तकारां सारू नाम मण्डावणो पांच फरवरी ऊं सुरू व्हेला। ई सारू ग्राम पंचायत थर माथे किसान पंजीकरण शिविर लगाया जावेला। मुख्यमंत्री श्री शर्मा राइजिंग राजस्थान ग्लोबल इन्वेस्टमेंट समिट रे तैत एम.ओ.यू. री समीक्षा करता अ निर्देश दिया। वणा ई ऊं जुड़्या मेहकमां ने मिशन मोड माथे काम करण ने कह्यो है।

000

मुख्यमंत्री भजनलाल शर्मा प्रदेश मांय होवण वाळी न्यारी-न्यारी भर्ती परीक्षावां मांय खास ध्यान अर सावचेती बरतण रा निर्देश दिया है। श्री शर्मा आज जयपुर मांय लोकसेवा आयोग अर राजस्थान कर्मचारी चयन बोर्ड कानी ऊं फरवरी म्हीना मांय होवण वाळी परीक्षावां री तैयारियां माथे समीक्षा करी। मुख्यमंत्री कह्यो के प्रश्न पत्रां री गोपनीयता अर हिफाजत माथे सब ऊं बत्ती ध्यान राखणो चाहिजे। वणा अहलकारां ने प्रतियोगी परीक्षावां साफगोई रे साथै करावण अर परीक्षा देवणियां सारू सुविधा रा चौखा इन्तजाम करण री बात कही। मुख्यमंत्री ने पुलिस ने गैर गतिविधियां री खास निगे राखण ने कह्यो। साथै ई वणा परीक्षा केन्द्रा माथे ई हिफाजत रा खास बन्दोवस्त कर्या जावण रा निर्देश दिया। मीटिंग मांय आर.पी.एस.सी. सचिव रामनिवास मेहता बतायो के डमी उम्मीदवारां ने परीक्षा मांय भेळा होवण ऊं रोकण सारू अर्जी अर हाजरी सीट माथे अंगूठा निशाणी लेवण रो नवाचार ई कर्यो जावे। आर.पी.एस.सी. कानी ऊं प्री-आर.ए.एस.परीक्षा दो फरवरी ने ली जायेला। वटे ई राजस्थान माध्यमिक शिक्षा बोर्ड 27 अर 28 फरवरी ने राजस्थान अध्यापक पात्रता-रीट परीक्षा रो आयोजन करेला।

000

राजस्थान पुलिस कानी ऊं आ दिनां ऑपरेशन साइबर शील्ड अभियान चलायो जावे। 31 जनवरी ताई चालण वाळां ई अभियान रा तैत लोगां ने साइबर धोखाधड़ी, ठगी, फर्जी कॉल सारू जागरूक कर्या जावे। झालावाड़ मांय अभियान रा तैत पुलिस न्यारी-न्यारी ठौड़ां ऊं चोरी व्हा मोबाइल वां रा मालिकां ने सूप्या। साथै ई साइबर अपराधां ऊं बचण री समझाईश करी। पुलिस अधीक्षक ऋचा तोमर बतायो के आ मोबाइलां री बरामदगी सारू खास टीम बणायी ज्यी है।

इणी कड़ी मांय आज पाली जिला रा मारवाड़ जंक्शन रेल्वे स्टेशन माथे आर.पी.एफ. कानी ऊं जात्रियां ने साइबर अपराधां रा बारा मांय जाणकारी दीरीजी।

000

सड़क सुरक्षा अर यातायात नियमां री जागरूकता सारू मनाया जावण वाळां राष्ट्रीय सड़क सुरक्षा माह रे तैत आज ई प्रदेश मांय न्यारा-न्यारा कार्यक्रम व्हा। जयपुर मांय राजस्थान पुलिस अकादमी मांय दो दिन रो राज्य थर रो क्षमता संवर्धन प्रशिक्षण कार्यक्रम आज सुरू व्ह्यो। आर.पी.ए. रा निदेशक एस. सेंगाथिर बतायो के इण रे तैत प्रशिक्षकां सड़क हादसां मांय कमी लावण, यातायात बन्दोवस्त सरल अर हिफाजती बणावण रे साथै ई सड़क सुरक्षा नियमां री पालना माथे सिखावण दी जावे।

अलवर मांय सड़क सुरक्षा माह रे तैत आज हेलमेट बाटी ज्यी। वटे ई झालावाड़ मांय वाहन जागरूकता रैली निकाली ज्यी। अजमेर मांय टैक्सी चालकां री आंख्यां री जांच करी ज्यी अर जरूरत मुजब अनुसार चश्मां बाटी ज्यी।

000

संसदीय कार्यमंत्री जोगाराम पटेल कह्यो के आवता बजट सत्र मांय आ कोशिश करी जायेला के सदन बत्ती ऊं बत्ती चाले। खबरनवीसां ऊं बतळ मांय वणा विपक्ष ऊं आप री भूमिका असरदार तरीका ऊं निभावण री अरज करी। श्री पटेल कह्यो के विपक्ष ने सरकार री स्वस्थ आलोचना करण सारु आगे आवणो चाहिजे।

000

प्रदेश मांय ईट-भट्टां ऊं होवण वाळां वायु प्रदूषण माथे रोक लगावण सारु नुवी तकनीक ऊं सगळा ईट-भट्टां मांय बदलाव कर्यो जावे। ई सारु जिग-जैग तकनीक री मदद ली जावे। ई तकनीक ऊं बण्या ईट-भट्टां ऊं पैली रा भट्टां ऊं चोखा ताप अर बत्ती आंच खमता वाळां होवे है। एक रपट—

000

बाडमेर जिला रा धोरीमन्ना मांय चाल रह्यो आलमजी पशु मेळो आज पूरो व्ह्यो। समापन जळसां मांय उद्योग राज्य मंत्री के.के. विश्णोई ई मौजूद रह्या। हफ्ताभर भरी ज्या ई मेळां मांय खास तौर माथे ऊंटां री री खरीद-फरोख्त व्ही। इण रे साथै ई मेळां मांय लाग्या हाट बाजार ई लोगां सारु आकर्षण रो केन्द्र बण्यो रह्यो।

00

पैली मुख्यमंत्री अशोक गहलोत देशभर मांय नशा री बधती समस्या माथे चिंता जताई है। वणा सरकार ऊं नशा रा कारोबारियां माथे करडी कार्रवाई करण री अरज करी। श्री गहलोत सोशल मीडिया पोस्ट मांय राज्य सरकार ऊं श्रीगंगानगर, हनुमानगढ़, बीकानेर अर जोधपुर माथे खास ध्यान देवण री मांग करी।

000